

禹貢集釋

禹貢集釋自敘

釋禹貢者以孔安國爲最古顧安國傳爲廣作不足徵信
胡東樵斥爲顛預鶻突不甚分明蓋知言也東樵雖指畧
例又稱司馬遷從安國問古文班氏崇古學漢志所稱古
文卽安國壁中古文之說水經酈注爲禹貢之功臣誠哉
其知言也余獨惜東樵能知古人而不能信好古學雖指
一書踵謬沿譌悖古文而逞臆見後之學者將何所取正
焉夫釋禹貢者莫善于司馬子長班孟堅桑君長三家酈
注擇精語詳補水經所未及明此數家于禹貢思過半矣
漢鄭君古注屬有存者許君說文亦有古文說皆卓然古

學此皆禹貢之津筏舍此而欲通禹貢譬猶杭絕流斷港而欲至于海也漢書儒林傳孔氏有古文尚書孔安國以今文字讀之司馬遷從安國問故遷書禹貢多古文說史記夏本紀敷作傅岷作汶斥作渴壓作禽豬作都球作璆岳作嶽溢作泆錫作賜導皆作道崑崙作昆侖皆古文也又澧作醴噢作奧暨作泉灘作雍沿作均皆與班志合潛作涪與韓詩合漾作潏刊作栞究作沆並與說文合鳥夷皮服榮播旣都作十有三年皆與馬鄭古文合說隨山刊木爲行山表木說奠高山爲定說降邱宅土爲下邳居士說篠簜爲竹箭說孔殷爲甚中說男邦爲任國說禹錫元

圭告厥成功爲帝乃錫禹元圭告成功于天下河渠書說
北載之高地過降水同爲逆河入于勃海此真古文書說
子長得之安國正義所謂身爲博士具見圖籍者非古文
僞傳比也今東樵于島夷仍依僞古文于元圭从蔡傳禹
以爲贄之說是不信子長真古文也班孟堅撰地理志自
謂采獲舊聞考迹詩書推表山川以綴禹貢漢志藝作藝
攸作迺野作埜濱作瀕草作艸潛作潛澧作酆伊洛作雒
漾水作養漳水作章西傾作頃厥篚作棐是來作徠維瀟
作畱夏翟作狄渠搜作叟陪尾作倍尾孟津作盟津雲土
夢作雲夢土皆古文也志稱禹貢山水三十五又稱古文

者十有一東樵子志言禹貢嶓冢漾水沔水大別桓水及古文終南流沙陪尾皆所不取是不信孟堅真古文也新唐書志謂水經漢桑欽作東樵疑非欽作又據酈注漂水引桑欽地理志謂欽所撰名地理志不名水經此則大謬案漂水注引桑欽地理志曰漂水出高唐漢地理志高唐下桑欽言漂水所出善長所引桑欽地理志連文卽謂漢地理志桑欽說非欽別撰地理志也東樵誤會酈注遂謂欽所作名地理志此酈書燕說也水經原出桑欽後人論加埒益故有東漢三國地名漢儒林傳稱塗惲授桑欽古文尙書則桑欽所說亦依古文書也地理志引桑欽

者七絳水汶水漯水弱水淮水均有裨於禹貢說文引汶水出琅玕朱虛東泰山入濰桑欽說汶水出泰山萊蕪西南入沛濕水出東郡東武陽入海桑欽云出平原高唐弱水自張掖刪丹西至酒泉合黎餘波入于流沙桑欽說水經禹貢山水澤地所在凡六十多桑欽古文說東樵于嶠冢積石流沙大別陪尾東陵大邳皆不依水經說獨取九江在長沙下雋之說不知後人所竄入非桑欽之本文也東樵旣顯悖水經而于酈注亦援引多誤是不信桑欽真古文也鄭康成從張恭祖受古文尙書今書注已佚其見于他所引者說禹貢山水大抵墨守班志引地理志凡三

十有九惟梁州江沱及導黑水降承大陸引地志而不从
其說餘皆從班志淄水引地志出泰山萊蕪縣志又言入
沛鄭不引者水經稱淄水入海是禹時故道不入沛鄭之
學博而精矣今考鄭注赤埴作戠與徐邈合和夷爲桓與
酈注如氏說合訓箇箒云聆風卽馬融長笛賦所稱聆風
也于九河云今河間弓高以東至平原鬲津往往有其遺
處漢許商平當言成平鬲縣界有徒駭胡蘇鬲津等河鄭
君之說核矣東樵于鄭注引用甚尠而獨取三江之說不
知乃徐堅誤引非鄭君之注也于冀州不書其界不取鄭
注帝都廣大之說而取孔傳以餘州所至境界則可知鄭

注謂大伾在成皋三澨在竟陵東樵皆所不取是不信鄭君真古文也許君說文敘其僞孔氏皆古文也又云古文孔子壁中書也今考說文引禹貢繇作蘇漸作蘄篠蕩作筱與古文論語合又引書曰竹箭如檣卽古文書說篠蕩之文周禮職方氏注故書箭爲晉晉稽聲相近皆古文也瑤琨作璣與馬融書及班志合璣珠作玼與大戴禮保傅篇合浮于淮泗達于荷與水經泗水篇合沈卽究之正字究俗字也濕卽漑之正字漑借字也濟水字當作洿與出贊皇之濟別說若丹石可以爲矢鏃說禹貢鏃剛鏃可以刻鏃說三澨澨埤增水邊人所止者說嶧陽葛嶧山在東

海下邳說陶邱再成邱也在濟陰陶邱有堯城堯嘗所居
故堯號陶唐氏說峴山弱水之所出卽張掖雞山也說鰲
山在蜀郡湔氐徼外卽羊膊岷山也濰水出瑯玕箕屋山
東入海引夏書濰淄其道淖水朝宗于海从水朝省朝宗
卽潮之正字淖與朝同是海潮已見于禹貢矣渭水出隴
西首陽渭首亭南谷東入河杜林說夏書以爲出鳥鼠山
卽杜林漆書古文說也東樵于淮泗達荷取說文而謂荷
在山陽湖陸乃出自後人禹時未有漾水出隴西東至武
都爲漢亦所不取不知許君說荷漾與班志同皆古文東
樵于九江孔殷引說文殷薦上帝訓殷爲衆達古文殷中

之義是不信許君眞古文也嗚呼博學如東樵猶不能信
好古文證合經義其所著書多沿宋以後之俗說泝其流
而不先溯其源猶導河不干積石導江不干岷山烏在其
能行水也余旣爲之正誤以匡東樵之失復采獲古文甄
錄舊說砭俗訂譌斷以己意自史漢水經注及許鄭古學
取其說之確者著于篇傳以後儒之解證以地志期于發
摛經文無取泥古其引用前人說各繫姓氏于下輯禹貢
集釋三卷庶以備遺忘便尋省其有不符應時輒改先儒
有言前人之失吾知之吾之失吾不能自知也安得信好
古學者而就正之哉戊子三月山陽丁晏自敘

禹貢集釋卷之一

淮安山陽丁晏學

虞夏書

馬融鄭康成王肅劉向別錄

禹名也

顧炎武

上古淳樸無嫌於名

胡渭

賦者自上稅下

之名貢者從下獻上之稱

孔疏

昏墊之餘一旦平定民

安居樂土自然懷報上之心以其所有獻於上故謂之

貢以言名雖曰賦非強爲科率民之願輸亦若貢物然

此所以統名之曰貢也

張九成

序禹別九州隨山濬川任土作貢

任土謂定其肥磽之所生

鄭康成

禹敷土

史記夏本紀作傅土鄭注大司樂亦作傅土

敷分也

馬融

布也

鄭康成

禹分布治九州之土

傳

首言敷

土見禹之胸中先有一定之規模然後用功所以有成

呂祖謙

蔡傳本張子韶說以敷爲分別非

隨山刊木

漢志作栒顏云古刊字淮南修務訓亦作栒說文作栒云槎識也讀若刊史記隨作行刊作表

隨州中之山而登之除木爲道以望觀所當治則規其

形而度其功

鄭康成

隨行山林

傳

山行多迷刊木以表之

且以通道

蘇軾

奠高山大川

史遷說奠爲定

冀定也形勢以山川爲定山川以其高且大者爲主氏葉

高山山之會也大川所以紀理衆小水也黃度州縣之

設有時而更山川之形千古不易所以禹貢分州必以

山川定疆界鄭樵

大傳說高山大川五嶽四瀆之屬馬融曰定其差秩

祀禮所視也書傳蔡傳同此說今不从

冀州史遷說禹行自冀州始

堯所都也傳兩河間曰冀州不書其界者時帝都之使

若廣大然鄭康成堯水河爲患最甚河行冀兗爲多而青

徐其下流被害尤甚堯都於冀故禹行自冀始蘇氏冀州

今山西之太原平陽汾州潞安大同五府澤遼沁三州
直隸之順天永平保定廣平順德宣化六府及真定河
間二府西北境大名府濬縣西境 盛京之錦州府河

南之懷慶衛輝彰德三府其北直抵塞外陰山下西起

東受降城

今蒙古名薩爾瓦村

之北東訖於大遼水也

地理今釋

傳云此州帝都不說境界以餘州所至則可知蔡傳
同胡渭依其說今不从

既載壺口治梁及岐

先儒讀既載爲句馬融曰載載于書也今從蘇氏說讀既載壺口爲句

載之言事事謂作徒役也地理志壺口在河東北屈梁
山在左馮翊夏陽岐山在右扶風美陽西北於此言治

梁及岐者蓋治水從下起以襄水害易也鄭康成壺口在

冀州梁岐在雍州從東循山治水而西傳其先河出孟

門之上橫流而出則知壺口梁岐皆墊於水矣禹於壺

口之西闢孟門於梁山之北闢龍門而其餘功又及岐

山焉蓋壺口梁岐一役也其施功皆同時不可分言於

二州故並言於冀也曾氏壺口今山西平陽府吉州西

南七十里有壺口山黃河之水注其中如壺然梁岐今

陝西西安府韓城縣西北九十里之梁山鳳翔府岐山

縣東北四十里之岐山也地理今釋

冀州有三壺口一在吉州西南禹貢之壺口也一爲

汾陰縣西南之平山平水所出亦名壺口山水經汾水注誤以爲尙書之壺口一在長治縣東南左傳哀四年取壺口杜注潞縣東有壺口關卽今潞城縣關以山爲名此二者皆非禹貢之壺口也

雍州有二梁山一在韓城縣西北詩所云奕奕梁山禹貢之梁山也一在乾州西北西南接岐山縣界卽孟子所云踰梁山元和志誤以爲治梁之梁非禹貢之梁山也

蔡傳疑雍州之山不當載於冀州从晁以道說以爲呂梁狐岐指今山西汾州府永寧州東北之呂梁山

一名骨脊山爲梁山汾州府孝義縣西之狐岐山一名薛頡山爲岐山然二山去河甚遠不得謂河水所經

既修太原至于岳陽

岳陽縣太岳之南於地理志太原今以爲郡名

今山西太原府

太岳在河東故縣潞東

潞縣今山西霍州太岳在州東三十里

名霍太山

鄭康成

高平曰太原山南曰陽

傳

太原汾水之所出岳陽

汾水之所經道汾水故也

曾氏

傳言禹能修鯀之功蓋有

因而修之者焉

葉氏

岳陽凡太岳山南皆是其地當直抵

南河

胡渭

凡既字皆據成功言工力創造曰治沿緒曰修

道里附近曰及總括曰至皆書法也

茅瑞徵

太原在平陽東北左傳臺駘能業其官以處太原卽書所謂太原矣亦謂之大鹵春秋昭元年晉敗狄於大鹵三傳皆作大原穀梁云中國曰太原夷狄曰大鹵又謂之大夏史記禹鑿龍門通大夏左傳遷實沈於大夏是也又謂之夏虛左傳命唐叔封於夏虛是也又謂之晉陽左傳晉趙鞅入於晉陽以叛是也蓋皆太原之異名若詩云薄伐玁狁至于太原周語宣王料民於太原顧氏曰知錄謂在今平涼後魏立爲原州朱子呂東萊嚴粲以爲太原陽曲縣誤也

覃懷底績至于衡漳史遷說底績為致功

懷縣屬河內今河南懷慶府地衡漳者漳水橫流入河鄭康成覃

懷二字其為一地衡即古橫字地理志清漳水出上黨

沾縣沾縣今山西樂平縣濁漳水出長子縣東今潞安府長子縣至鄴縣

今臨漳縣西有鄴縣故城入清漳孔疏覃懷平地也懷襄之時平地致

功為難故曰底績會氏冀州三面距河河為大患故禹所

治自壺口至衡漳皆所以治河之害與夫別流之入於

河也夏侯

厥土惟白壤

壤天性和美也馬融水去土復其性色白而壤傳

書傳無塊曰壤顏師古曰柔土曰壤鄭注周禮十有二壤曰壤亦土也變文耳

賦賦惟上上錯

地有上下相錯通率第一

馬融

此州入穀不貢

鄭康成

錯雜

也此州先賦後田殊於餘州不言貢篚亦差於餘州

傳

冀州賦先於田王畿千里之地并與園廛漆林之類而征之賦非盡出於田也冀州不言貢篚天子封內無所

事於貢也

林氏

偽孔傳謂錯出第二之賦蘇氏謂賦田出粟米兵車

指軍賦言蔡傳並从之今不取

厥田惟中中

田著高下之等者當爲水害備也

鄭康成

田之高下肥瘠

九州之中爲第五

傳

田賦之等不同賦之九等以各州

歲入總數較其多寡而爲高下也數之最多者爲上上

田之九等以各州土地所宜較其肥瘠而爲高下也地

之最肥者爲上上

吳澄

恒衛旣從大陸旣作

史遷恒作常

地理志恒水出恒山

恒山在今直隸定州曲陽縣

衛水在靈壽

今正定府

靈壽縣

大陸澤在鉅鹿爾雅釋地八藪晉有大陸

鄭康成

今

鉅鹿縣廣河澤是也廣平曰陸

孫炎

大陸之地已可耕

作傳

班志謂恒水出常山上曲陽縣東入漣水衛水出常山靈壽縣東入滹沱胡渭謂恒卽漣水衛卽滹沱古今異名今不从

冀州有三大陸漢志鉅鹿禹貢大陸澤在北呂氏有始覽云趙之鉅鹿高注廣阿澤也大陸澤在今直隸順德府鉅鹿任縣及趙州隆平縣界此禹貢之大陸也呂覽九藪又云晉之大陸注云魏獻子所居左傳定元年魏獻子田於大陸杜預謂吳澤陂近甯在今河內修武縣淮南子亦分大陸鉅鹿爲二藪水經濁

漳水注謂自甯迄於鉅鹿出於東北皆爲大陸合太
陸鉅鹿爲一非也水經注又謂呂氏春秋大陸卽鄔
澤在今太原介休縣界二者皆非禹貢之大陸也
蔡傳引程大昌大陸非鉅鹿廣阿鉅鹿去古河遠大
陸者四無山阜曠然平地杜佑李吉甫以爲邢趙深
三州之地今不从

島夷皮服夾右碣石入于河

史記漢書並作鳥夷河史記作海

鳥夷東北之民賦食鳥獸者

鄭康成

以皮服來貢蔡地理傳

志漁陽驪成自注大碣石山在縣西南遼西蔡縣自注

有碣石水南入官

班固

碣石山在遼西臨渝縣南水中

水經

禹貢山水澤地所在碣石在臨渝或云無此山也

山海經郭注

碣石山

負海當河入海之衝自海道夾出碣石之石然後入河

而達帝都也

朱子

賈讓言破碣石碣石類砥柱橫絕中流

當河之衝者也破之不容已矣碣石本在臨渝海中昔

有而今亡

胡渭

案說文碣特立之石東海有碣石山漢書武帝紀東

巡海上至碣石文頴曰在遼西桑縣桑縣今罷屬臨

渝此石著海旁水經注大禹鑿其石夾右而納河秦

始皇漢武帝皆嘗登之海水西侵歲月逾甚而苞其

山故言水中矣又河水注云河之入海舊在碣石今

川流所導非禹瀆也張君云碣石在海中蓋淪於海水也後魏志碣石在肥如隋志北平盧龍縣臨渝宮有碣石案碣石當在今永平府昌黎縣漢桑縣地永平府又有臨渝縣又盧龍縣有肥如故城樂亭縣有驪成故城今皆屬永平府地並相近實一山也

案正義孔讀鳥爲鳥康成云鳥夷東方之民搏食鳥獸者也王肅云鳥夷東北夷國名也是史遷班固康成王肅並作鳥夷釋文引馬云鳥夷北夷國馬融本作鳥與王注祠其作鳥者後人改也顏師古漢書注云此東北之夷搏取鳥獸食其肉而衣其皮也自僞

孔傳訓鳥夷爲海曲唐石經直改經作鳥古經遂失其真集韻二十二皓鳥古作鳥羣經音辯鳥部鳥海曲也當老切書鳥夷是北宋孔傳本猶有作鳥字者又漢志鳥夷卉服師古曰鳥夷東南之夷善捕鳥者也史記于揚州作鳥夷前後不符明爲後人竄改也總之經文本作鳥夷卽訓海曲亦不當改作鳥字

案碣石之說不一鄭康成云戰國策碣石在九門縣

今屬常山郡蓋別有碣石與此同名今驗九門無此

山也

九門今正定府藁城縣今戰國策亦無此文

王充耘謂今合口御河

入海處北岸有石山聳立狀如小孤山俗呼爲碣石

古人嘗鐫銘其上王伯厚謂在高麗界者爲左碣石
在平州南者爲右碣石金吉甫謂左碣石在高麗而
沙門島對岸之鐵山當勃海之口者爲禹貢之右碣
石不獨於古無稽並以右字屬下讀於經文亦戾矣
郭造卿碣石叢談以昌黎縣北十里仙人臺當之劉
世偉以馬谷山爲碣石顧亭林肇域志亦云濟南府
海豐縣有馬谷山卽古之碣石地理今釋取之其說
不一難以信從今从漢志

釋文夾帶也蘇氏曰夾挾也自海入河逆流而西右
顧碣石如在挾掖也

濟河惟兗州

漢書齊作沛史記兗作沔

東南據濟西北距河

傳

言兗州之界在此兩水之間

鄭氏

河患惟兗爲甚兩岸無山皆是平地所以潰決禹自其

決處導之用工尤難

朱子

兗州今山東東昌府及兗州府

曹州陽穀壽張鄆城三縣濟南青州二府西北境直隸

大名府及眞定河間二府東南境河南衛輝府胙城縣

地理
今釋

說文水部沔水出河東東垣王屋山東爲沔古文作

沿沔沔也東入于海顏師古云沔本濟水之字從水

沔聲說文濟水出常山房子縣贊皇山沔正字濟借

字當依漢志爲正

九河既道

九河名徒駭太史馬頴覆釜胡蘇簡絜鉤盤鬲津

馬周融

時齊桓公塞之同爲一今河間弓高以東至平原鬲津

往往有其遺處

鄭康成

河水分爲九道

傳

九河簡絜爲二自郭璞孫炎李巡孔穎達並同蔡傳據曾氏之說合簡潔爲一河其一則河之經流也林之奇謂九河勢均安得以一爲經流入爲支派哉駁之甚當

漢溝洫志許商言古說九河之名有徒駭胡蘇鬲津

今見在成平東光隔界中自隔以北至徒駭間相去二百餘里今河雖數移徙不離此域平當云九河今皆寘滅馮遂云九河今既滅難明王橫云九河之地已爲海所漸水經漳水注九河既播八枝代絕遺跡故稱往往時存杜佑通典於許商所得之外又得其三鉤盤在景城郡界馬頰覆釜在平原縣界惟太史簡絮三河未詳處所史記正義云簡在貝州厯亭縣界金地理志南皮縣有潔河明一統志太史河在南皮縣北以漢人所不能知而一一考之詳悉今所不取

漢書勃海郡咸平縣自注虓池河民曰徒駭河東光
縣自注有胡蘇亭平原部鬲縣自注平當以爲鬲津
般縣顏注引九河鉤般爲說敘傳自茲距漢北亡八
支其一存者卽是徒駭孔疏徒駭是河之本道東出
分爲八支本此班孟堅以徒駭爲虓池漢世近古必
有所據且以徒駭在咸平亦與許商合也書疏徒駭
今在咸平東光縣今有胡蘇亭亦本漢書

又樂史以馬頰爲篤馬河案溝洫志孫禁欲開篤馬
河許商謂孫禁所欲開者在九河南則篤馬河非九
河之迹樂史失之

公羊疏引尙書中候云齊桓之霸過八流以自廣書
疏引春秋緯寶乾圖云移河爲界在齊呂壤過八流
以自廣鄭注本此水經河水五亦云齊桓霸世塞廣
田居同爲一河爾雅釋文引郭璞音義云周時齊桓
公塞九河並爲一自鬲津以北至徒駭二百餘里渤
海東莞成平平原河間弓高以東往往有其處焉亦
本鄭說

後漢書袁紹傳公孫瓚還屯槃河注云故河道在今
德州昌平縣界入滄州樂陵縣今名枯槃河太平實
字記滄州樂陵縣鉤盤河在縣東南五十里

揚雄兗州箴九河既導漢書注一說道讀曰導導治也今不从

雷夏既澤灘沮會同

澤史記漢書作雍

雍水沮水相觸而入此澤中地理志曰雷澤在濟陰成

陽

鄭注今山東東昌府濮州東南有雷澤接曹州界

洪水之時高原亦水澤不

爲澤雷夏既澤高地水盡此復爲澤也

正義

灘水沮水二

源俱出雷澤縣西北平地去縣四十里雷夏澤在縣北

郭外灘沮二水會同此澤

元和郡縣志

案水經注瓠子河東逕雷澤北澤在大成陽故城西

北十餘里其陂東西二十餘里南北十五里卽舜所

漁也

蔡傳引山海經澤中有雷神龍身而人頭鼓其腹則雷今所不取

爾雅釋水水自河出爲灇郭注引書灇沮會同又釋水濟爲澹晁氏曰沮有澹音二水河濟之別也案說文河灇水在宋又云汧水至蒙爲灇水汧在豫州與禹貢兗州無涉水經汧水下引爾雅濟別爲澹與禹貢之沮益無涉史記正義引括地志雷夏澤在濮州雷澤縣郭外西北灇沮二水在雷澤西北平地和輿記並同王晦叔引九域志濮州有沮溝卽灇沮會同當據以釋禹貢蔡傳引曾氏晁氏之說失之周禮兗州其浸盧維鄭注當作雷雍引此雷夏既澤

蓋以雷爲雷澤雍爲澠水也鄭說確不可易

桑土既蠶是降邱宅土

其地尤宜蠶桑今濮水之上地有桑間者水害既除於是下邱居士以其免於厄尤喜故記之

鄭康成

衛得桑土之野楚邱帝邱旄邱皆是也其詩曰降觀于桑說于桑田兗州境又有瑕邱廩邱散邱皆在濮水之濱雷夏澠沮皆在濮州境故桑土既蠶繼言之厥土黑墳厥草惟繇厥木惟條

墳有膏肥也繇抽也

馬融

條長也

傳

水土平草木亦得遂

其性

林氏

漢地理志壤墳應劭讀墳爲肥墳肥一聲之轉馬義
得之僞傳謂色黑墳起非也傳又訓繇爲茂今並不
从

厥田惟中中厥賦貞作十有三載乃同

載史漢馬鄭並作年

貞正也治此州正作不休十三年乃有賦與八州同言
功難也

鄭氏

諸州賦無下下貞卽下下爲第九也

正義充當

河下流之衝被害尤劇必作治十有三載然後賦法同
於他州

蔡傳

因其受患之深所以優恤之至

王充耘

馬融謂十三年而兗州平以爲禹治水之年今不取
載當依史漢馬融作年其作載者泥唐虞日載之文

東晉古文竄改也

厥貢漆絲厥篚織文

篚漢書作斐

貢者百工之府受而藏之其實於篚者入於女功故以

貢篚別之

鄭氏

究地宜漆宜桑故貢漆絲

蔡傳

織文織而有

文者也

正義

綾羅之屬

吳氏

吳氏謂染其絲五色織之織貝不染五色而織之成

文曰織文孔傳謂織文錦綺之屬非也漆當爲漆此

段漆水字篚依說文當作匪

浮于濟漂達于河

漂說文作濕當从之

舟行水曰浮究之貢浮濟浮漂以達于河帝都冀州三

面距河達河則達帝都矣

蔡氏

因水入水曰達

傳

濕水出

東郡東武陽入海桑欽云出平原高唐

說文

今曹州府朝

城縣有東武陽城

漢志東郡東武陽自注禹治漯水東北至千乘入海
過郡三行于二百里千乘郡有溼沃縣漯水所經故
名溼卽濕字之訛也水經注作漯沃可證又平原郡
高唐自注桑欽言漯水所出又溝洫志禹迺醴二渠
以引其河孟康曰醴分也分其流泄其怒也二渠其
一出貝邱西南南折者也其一則漯川也河自王莽
時遂空唯用漯耳史記河渠書作廝二渠醴廝音義

同

又蔡傳誤會程大昌漢河非禹河竟不知漯水所在
陳師凱書傳旁通云程氏之意非指漯爲漢河蓋言
漯入河處所受河水乃漢以後所徙頓邱之河非禹
時澶相以北之河其漯水仍以東武陽爲是且水經
注敘漯水源委極明蔡傳乃以爲未詳何耶

新唐書許敬宗傳高宗問今濟漯不相屬何故敬宗
對曰書言浮汶達濟不言合漯者漯自東武陽入于
乘入海也胡東樵謂濟漯本相通西漢末二水爲河
所隔敬宗憑臆以對未可以證禹貢也

海岱惟青州

東至海西至岱東嶽曰泰山鄭康成青州之界從岱山東

厯密州東北厯海曲萊州越海分遼東樂浪三韓之地

西抵遼水也杜佑青州今山東登州萊州二府青州府益

都臨淄昌樂安邱壽光臨朐六縣及諸城高苑博興樂

安四縣南境濟南府肥城長清厯城章邱鄒平長山新

城淄川八縣及泰安府萊蕪縣北境兗州府東阿平陰

二縣北境其東北跨海爲盛京奉天府訖於朝鮮國也

地理
今釋

嶠夷旣略

岯夷地名

馬融

卽堯典宅岯夷是也

正義

略爲之封畛也

蔡氏

王地接於夷不爲之封畛則有猾夏之變

曾氏

碣石之功

畢禹卽東行遼東經略岯夷然後渡海而南治濰淄二

水也

胡渭

堯典正義岯夷尙書考靈曜及史記作禺鍤今史記

五帝紀作郁夷張守節曰郁音隅夏本紀仍作岯夷

司馬貞曰今文尙書及帝命驗竝作禺鍤在遼西鐵

古夷字也說文土部隅夷在冀州陽谷引尙書宅隅

夷山部岯山在遼西一曰岯鍤岯谷金部古文鍤从

夷形相近也

堯典馬融注嶠海嶠夷萊夷也又後漢書東夷有九種贊曰宅是嶠夷是以東方九夷爲嶠夷也通典用其說金氏从之薛氏謂今登州之地于欽齊乘又謂甯海州爲禹貢嶠夷今不取

馬融謂用功少曰略傳同案左傳天子經略諸侯正封又曰封畛土略當从蔡傳

濰淄其道

漢書作惟留顏曰惟字今作維留字或作淄古今通用也

濰淄雨水名地理志濰水出瑯邪箕屋山淄水出泰山萊蕪縣

鄭康成

箕縣今青州府莒州萊蕪今泰安府萊蕪

縣上言旣道禹爲之道也此言其道汜濫旣去水循其

道也 蔡氏

漢志琅邪郡箕縣自注禹貢維水北至都昌入海過郡三行五百二十里泰山郡萊蕪縣自注原山留水所出東至博昌入沛班志言入沛鄭不引者水經稱留水入海是禹時故道不入濟足徵鄭學之核

左傳襄十八年晉師東侵及濰通鑑梁武帝紀魏李叔仁擊邢杲於惟水胡三省注惟當作濰此二者皆禹貢之濰也淄水卽臨淄之淄尙父所封淄澠之淄易牙所嘗周禮幽州浸曰淄時皆此水也括地志謂禹治水功畢土石黑數里之中波若漆當作淄淄爲

正說文無溜字俗加水旁

厥土白墳海濱廣斥

史記作海濱廣潟厥田斥鹵漢書作海瀕廣潟

斥謂地鹹鹵

鄭氏

說文鹵鹹地也東方謂之斥西方謂之

鹵海畔迴闊地皆斥鹵故云廣斥言水害除復舊性也

正義

平地則色白而性墳至于海濱則彌望皆斥鹵之地

斥者鹹土可煮以爲鹽者也

林之奇

管子曰齊有渠展之鹽注渠展地名涉水入海之處
爾雅十藪齊有海隅郭注以海濱廣斥當之史漢作
廣潟廣韻潟鹹土溝洫志終古舄鹵今生稻梁卽斥
鹵也濱俗字當作瀕爲正說文瀕水厓也

厥田惟上下厥賦中

田第三賦第四傳

厥貢鹽絺海物惟錯

絺細葛錯雜非一種

傳

海物水族之可食者

林氏

貢物不

以精麤爲敘而以多少爲敘青州鹽居多故敘於先也

他放此

蔡元度

宋史食貨志鹽類有二引池而成者曰顯鹽周官所

謂鹽鹽也鬻海鬻井鬻鹹而成者曰末鹽周官所謂

散鹽也康成謂海物海魚也魚種類尤雜然如青州

蟹胥之類皆海物不獨魚也

岱畎絲枲鉛松怪石

釋文徐本作畎谷

畎谷也怪異好石似玉者岱山之谷出此五物皆貢之

傳

枲麻也鉛錫也

正義怪石砥礪之屬

釋文

周禮有典絲典枲喪服傳牡麻者枲麻也鹽鐵論曰古者庶人耄老而後衣絲其餘則麻枲而已是枲賤於絲也說文鉛青金也詩云徂徠之松徂徠卽岱之支峰也金吉甫云怪石如今萊之溫石可爲器李時珍曰紫石英太山所出甚瓌瑋其經之怪石乎

萊夷作牧

史記云爲牧

萊夷萊山之夷也

顏師古

可以放牧

傳

今萊州登州二府

皆禹貢萊夷地

胡渭

萊夷卽左傳夾谷之會萊人以兵劫魯侯史記晏平仲萊之夷維人維卽濰水金吉甫曰萊夷地宜畜牧吳幼清云作謂耕作牧謂放牧夷人以耕牧爲業分爲二事與史公云爲牧不合今不从

厥篚壓絲

史記作會絲

壓桑蠶絲中琴瑟弦

傳

釋木云壓絲山桑郭璞曰柘屬

也壓絲是蠶食壓桑所得絲韌中琴瑟

正義

壓桑出東萊

以織繪堅韌異常東萊人謂之山繭

蘇氏

浮于汶達于濟

漢書作沛

地理志汶水出泰山萊蕪原山西南入濟

鄭康成

不言達

河者因於究也

蔡傳

達濟則河自可達不待復書也

程大昌

汶入濟禹貢之汶論語汶上水經謂之北汶于欽謂

即今大清河與禹貢無涉

海岱及淮惟徐州

東至海北至岱南及淮

傳

七州皆言二至蓋以鄰州互

見至此州獨載其三邊者止言海岱則嫌於背止言淮

海則嫌於揚故必曰海岱及淮而後徐州之疆境始別

也

林氏

徐州今江南徐州府宿遷邳州睢甯及鳳陽府懷

遠五河虹靈璧四縣泗宿二州淮安府桃源清河安東

海州贛榆山東兗州府滋陽曲阜甯陽泗水金鄉魚臺
嘉祥鉅野汶上鄒城鄒滕嶧費等縣及平陰縣南境濟
甯東平沂三洲濟南府新泰縣及萊蕪縣泰安府南境
青州府莒州蒙陰沂水日照三縣及諸城縣南境地理今釋
淮沂其乂史記又作治

二水已治傳地理志沂水出泰山蓋縣今沂水縣西北有蓋縣故城

臨樂子山南至下邳入泗過郡五行六百里淮出桐柏
山發源遠矣於此州言之者淮水至此而大爲害尤甚
喜得其治故於此記之正義正

論語浴乎沂逕魯縣故城南北對稷門一名雩門水

經謂出尼邱山西北卽曾點所浴也與禹貢之沂無

涉

蒙羽其藝

漢書作藝

二山已可種藝

傳

地理志蒙山在泰山蒙陰縣西南山

東蒙羽山在東海祝其縣南

今嶧榆縣南祝其故城

詩云藝之荏

菽故藝爲種也

正義

魯頌奄有龜蒙論語東蒙卽此山也焦竑謂殛鯀處

下有羽潭卽左傳所云羽淵也然舜典傳謂羽山東

裔在海中今登州府蓬萊縣有羽山當是放流之地

與蒙羽無涉

大野既豬東原底平

漢書作大埜史記作既都

大野在山陽鉅鹿北名鉅野澤

今曹州府鉅野縣

東原地名今

東平郡

今東平州

卽東原

鄭康成

水所停止深者曰豬

馬融

底平

者水患已去而底於平也

晁氏

職方氏兗州澤藪曰大野爾雅十藪魯有大野左傳

哀十四年西狩於大野獲麟史記彭越漁於鉅野澤

中元和志大野澤在鉅野縣東五里南北三百里東

西百餘里于欽齊乘云澤卽梁山泊也

厥土赤埴墳草木漸包

埴黏土也

徐廣

漸包相包裹也

馬融

釋文埴鄭作戠徐鄭王皆讀曰熾正義戠埴音義同
廣韻戠作壑云赤土也說文薪草相薪苞也引書此
文文選蜀都賦柯葉漸包劉淵林注漸苞相苞裹而
同長也與馬義合偽孔傳謂漸進長包叢生蔡傳从
之今不取

厥田惟上中厥賦中中

田第二賦第五 傳

厥貢惟土五色

徐州貢土五色青黃赤白黑也

劉熙釋名

土五色者所以爲

大社之對

鄭氏

周書作雒解建大社於國中其地東青土南赤土西
白土北驪土中央疊以黃土韓詩外傳將封諸侯各
取方土苴以白茅以爲社史記正義引太康地記城
陽姑幕有五色土封諸侯錫之茅土用爲社姑幕今
莒州徐州境也漢書武帝賜齊王閎策曰青社燕王
旦曰元社廣陵王胥曰赤社郊祀志元始五年令徐
州牧歲貢五色土各一斗古制猶存

羽畎夏翟

漢書作夏狄釋文夏行雅反

羽山之谷貢夏翟之羽

鄭氏

釋鳥云翟山雉

正義

徐州貢此

夏翟之羽有虞氏以爲綏古之車服器用以雉爲飾者

多矣不但旌旄也

林氏

禹濬畎不遺窮谷以岱畎羽畎知

之

茅瑞徵

周禮天官有夏采注夏采夏翟羽色禹貢徐州貢夏翟之羽染人秋染夏注染五色謂之夏者其色以夏狄爲飾引禹貢羽畎夏狄古翟狄通用

嶧陽孤桐

地理志嶧山在下邳

今邳州

今下邳西葛嶧山也

鄭氏

孤特

也嶧山之陽特生桐中琴瑟

傳

詩云梧桐生矣于彼朝

陽蓋桐之生以向日者爲良必以孤桐者猶言孤竹之

管也

林氏

山陽之桐難得其孤生者尤難得也

陸佃

林少穎謂卽詩鳧繹非也漢志東海郡下邳自注葛嶧山在西古文以爲嶧陽又魯國驪縣自注故邾國嶧山在北應劭曰邾文公卜遷于嶧者也此卽鳧繹之繹嶧繹古字通用與嶧陽無涉

應劭風俗通梧桐出嶧陽山採東南孫枝爲琴聲甚清雅胡東樵謂琴瑟堂上之樂材取嶧桐絃以麋絲蓋其重也

泗濱浮磬

漢志作泗濱

泗水出濟陰乘氏

鄭氏本漢志乘氏今鉅野縣地

泗水出魯卞縣故城

東南桃墟西北又西逕其縣故城西

水經注

石在水旁水

中見石若水上浮然此石可以爲磬故謂之浮磬

正義正此

州制貢大略供禮樂之用

茅氏

泗水今出兗州府泗水縣

漢下縣地

水經注泗水自彭城又東南過呂縣南水上有石梁
焉故曰呂梁晉太康地記曰水出磬石書所謂泗濱
浮磬者也括地志亦云泗水至彭城呂梁出磬石今
徐州東南六十里有呂梁洪高誘淮南子呂梁在彭
城呂縣石生水中禹決而通之蓋卽磬石之所出也
白居易華原磬詩序云天寶中始廢泗濱磬用華原
石代之詢諸磬人則曰故老云泗濱磬下調不能和

得華原磬考之乃和由是不改今華原又廢而琢磬
皆用靈璧石矣

樂具五行金火木土皆有之獨浮磬取於水之精是

以五行備而入音諧矣

本願亭林

淮夷蠙珠暨魚

史漢作泉古暨字

淮水之上夷民獻此蠙珠與美魚也

鄭氏蠙是蚌之別名

正義正

說文玼珠也宋宏云淮水中出玼珠玼珠珠之有聲

夏書玼从虫賓作蠙釋文蠙字又作玼韋昭薄迷反

蚌也周禮玉府注佩玉銜牙蠙珠以納其間犬戴禮

保傳作衡牙玼珠玼珠有聲故用以爲佩歟薛士龍
引山海經文魮之魚是生珠玉今不取蔡傳以爲淮
白魚胡東樵以爲鱣鮪各指一端惟鄭云美魚得之
馬融謂淮夷二水名孔傳同王肅亦以淮夷爲水名
今不取

厥篚元纁縞

纁細也祭服之材尙細鄭氏縞細纁司馬彪子元黑以細

縞染爲黑也張守節正義徐水宜染黃氏

說文縞帛也今之絹也縞本白色六入爲元孔傳元
黑縞縞白縞纁細也以纁字關上下元纁縞爲二物

曾彥和謂黑經白緯爲織元也織也縞也爲三物顏
師古謂縞鮮支也今並不取

浮于淮泗達于河

古文尙書作達于荷說文引書亦作荷今俗本誤作河
耳荷澤與濟水相通徐州浮淮入泗自泗達荷也書達
于荷則達濟可知金氏由荷入濟以達于河此徐之貢道
也閭若

說文荷水在山陽湖陸南引禹貢浮于淮泗達于荷
水經濟水篇荷水又東過湖陸縣南東入于泗水酈
注澤水所鍾也引尙書浮于淮泗達于荷漢志山陽

郡湖陵自注禹貢浮于淮泗達于河水在南莽曰湖
陸應劭曰章帝更名湖陵蒔水正在湖陸此河字明
係蒔字之誤水在南謂蒔水在縣南水經注泗水引
此文作蒔水在南可證自程大昌禹貢論據說文以
正經文之誤後人多从之

淮海惟揚州

揚州界自淮而至海以東也

鄭氏

古揚州境今江甯揚州

廬州安慶池州太平甯國徽州鎮江常州蘇州十二府
滁和廣德三州鳳陽府鳳陽臨淮定遠霍邱盱眙天長
六縣壽州淮安府山陽鹽城二縣河南汝甯府光山固

始二縣光州湖廣黃州府羅田蘄水廣濟黃梅四縣蘄

州廣東潮州府及江西浙江福建皆是也

地理今釋

彭蠡既豬陽鳥攸居

史記豬作都攸作所漢書作道姑

彭蠡澤在豫章彭澤西南方謂都爲豬陽鳥鴻雁之屬

隨陽氣南北

鄭氏

澤水既豬禽鳥亦得其居止而遂其性

也

蔡傳

彭蠡今鄱陽湖

夏允彝

林少穎疑陽鳥爲地名如衛死鳥鄭鳴雁之類今不

从

三江既入

漢志會稽郡吳自注南江在南東入海毗陵自注江在

北東入海丹揚郡蕪湖自注中江出西南東至陽羨入

海班固吳卽今吳縣陽羨今宜興縣北江入海在毗陵北

今丹徒縣

司馬彪續郡國志亦从班說盛宏之荊州記曰江出

岷山至楚都遂廣十里名爲南江至尋陽分爲九道

東會于彭澤經蕪湖名爲中江東北至南徐州名爲

北江入海徐楚金說文繫傳江出岷山至楚都名南

江至尋陽爲九道名中江至南徐州爲北江入海楊慎

丹鉛總錄引此爲徐鼎臣注說文誤二說與漢志合孔穎達導江正義

亦依班志今从之南徐州今鎮江府晉太康二年丹徒爲毗陵郡治

水經尚貢山水澤地所在篇中江在丹陽蕪湖縣西南東至會稽陽羨縣入于海北江在毗陵北界東入于海說與班志同汚水篇又過毗陵縣爲北江注丹徒縣北二百步有故城本毗陵郡治注又引地理志江水至石城東出逕吳國南爲南江案地志丹揚郡石城下云分江水首受江東至餘姚入海于會稽郡吳下云南江在南東入海本屬二水道元貫穿爲一蓋石城爲南江之始吳縣爲南江之委正與班志相證明也

杜佑通典三江謂北江中江南江也顏監漢志注三

江謂北江中江南江也蘇子瞻曰豫章江入彭蠡而東至海爲南江岷江江之經流會彭蠡以入海爲中江漢自北入江會彭蠡爲北江先儒曾氏程秘易祓夏僎程大昌黃度陳普王充耘鄭曉郝敬章潢皆从蘇說

徐堅初學記引鄭元孔安國注左合漢爲北江會彭蠡爲南江岷江居其中則爲中江故書稱東爲中江者明岷江至彭蠡與南北合始得稱中也胡東樵雖指引此以證蘇說之確今考三江孔傳三江已入致定爲震澤疏引鄭注三江分於彭蠡爲三孔東入海

與初學記所引不合則知徐堅所引者非鄭孔之注也又北江傳云自彭蠡江分爲三入震澤亦與鄭說合惟鄭云入海孔云入震澤爲異又導江孔傳有北有中南可知疏又引鄭云東迤者爲南江徐堅因此造爲北江中江南江之說緣飾己意冠以先儒之名類書中往往有之東樵据初學記而不考正義故誤信之

釋文引吳地記松江東北行七十里得三江口東北入海爲婁江東南入海爲東江並松江爲三江史記正義張守節亦引顧夷吳地記同南齊庾仲初揚都

賦注今太湖東注爲松江下七十里有水口分流東北入海爲婁江東南入海爲東江與松江而三也此皆以松江東江婁江爲三江也蔡傳主庾說而誤爲庾仲初吳都賦失之甚矣

水經汚水篇南江則自牛渚上桐水過安吉縣爲長瀆厯湖口東則松江出焉江水奇分謂之三江口毛晃禹貢指南从水經三江口之說

水經汚水下篇引郭璞曰三江岷江松江浙江也又郭注山海經云岷山大江所出也嶮山南江水所出也岷山北江水所出也三江皆發源於蜀而注震澤

二說不同歸熙用三江論主景純前說

越語三江環之韋昭注三江松江錢塘浦陽江也釋文亦引韋昭云謂吳松江錢塘江浦陽江也初學記又引韋昭說岷江松江浙江亦悉在吳也此卽景純之說徐堅誤以韋昭當之總之禹治水時浙江並未施功安得以此爲禹貢之三江耶

虞氏志林松江到彭蠡分爲三道今不从

唐魏王泰括地志謂禹貢三江俱會彭蠡合爲一江入海

震澤底定

史記作致定

地理志會稽郡吳縣具區澤在西揚州藪古文以爲震

澤

班固

震澤吳南太湖名

傳

大江之南西偏莫大於彭蠡

東偏莫大於震澤二患旣平則揚之土田皆治矣

金吉甫

三江入海吳越始有可宅之土而水所鍾者獨震澤而

已

蘇氏

周禮職方氏其澤藪曰具區其浸五湖鄭注具區五

湖在吳南賈疏具區卽震澤一也越語韋昭注五湖

今太湖也黃子鴻胡東樵以揚州藪浸同處謂白包

山以西爲西太湖水始淵深自莫釐武山以東松江

笠澤之地水極灘淺古具區震澤之地分藪浸爲二

可備一說

篠簜既敷厥草惟天厥木惟喬厥土惟塗泥

史遷篠簜作竹箭敷作布

漢書草作少

篠箭簜大竹也

鄭氏

天長也

馬融

喬高也

傳

塗泥漸洳也

馬融

下地多水其土淖

蔡傳

釋草篠竹箭簜竹說文作筱箭屬小竹也引書筱簜既敷檡字注又引書竹箭始檡卽說夏書之文也

厥田惟下下厥賦下上上錯

田第九賦第七雜出第六

傳

土塗泥故其田下下南方

水淺土薄不如北方地力之厚

王炎

金氏謂古人尙黍稷田雜五種塗泥獨宜稻不利他種故第爲最下賦第七有時雜出於第六則人功亦稍修矣自唐以來江淮之田號爲天下最漕餉皆仰給於東南唐韓愈謂賦出天下而江南居十九顧亭林亦極言江南賦稅之重東南民力之竭東樵之書所爲三致意也

厥貢惟金三品

銅三色

鄭康成

僞孔傳金銀銅也古不尙金銀至後世始盛行當日夏時之貢惟白金之銅不當有金銀也僞傳今不取

瑤琨篠簜齒革羽毛惟木

史記作瑤琨竹箭漢書作瑤琨史漢俱無惟木二字江氏聲云

衍文

瑤琨美石次王者也

王肅

齒象牙革犀皮羽鳥羽毛旄牛

尾木櫜梓豫章

傳

說文琨石之美者引虞書揚州貢瑤琨或作璊班固

馬融俱作璊實一字也說文瑤玉之美者詩釋文引

說文作石之美者當从之

鳥夷卉服

漢書作鳥夷

此州下溼故衣草服貢其服者以給天子之官

鄭氏

爾雅釋草云卉草鄭訓草服甚確鄭云給官者卽郊

特牲所云草服也後漢書度尚傳椎髻鳥語之人章
懷注鳥語語聲似鳥引書鳥夷卉服則唐時尙有作
鳥夷者自開成石經改作島而古經不可復矣

傳云南海島夷草服葛越正義引吳都賦蕉葛升越
弱子羅紉蘇氏曰島夷績草木爲服如今吉貝木縣
之類蔡傳亦謂今南夷木縣之精好者亦謂之吉貝
以卉服卽下織貝考吉貝之名始見於南史不可以
當織貝之貝今不从

厥篚織貝

貝錦名詩云成是貝錦先染其絲乃織之則文成矣

鄭康

成

傳謂織細紵貝水物分織貝爲二今不从

厥包橘柚錫貢

小曰橘大曰柚其所包裹而致者錫命乃貢言不常傳

橘柚常貢則勞民害物故錫命乃貢蘇氏

鄭注謂此州有錫則貢之案經納錫大龜錫貢磬錯

豈皆貢錫乎今不从

沿于江海達于淮泗史漢沿作均達作通

順流而下曰沿沿江入海自海入淮自淮入泗傳此經

蒙徐之文曰達于淮泗則由荷入濟可知也胡渭

釋文沿鄭本作松松當爲沿馬本作均云均平史記
注引鄭云均讀曰沿沿順水行也顏師古曰均平也
一切經音義引三倉云循古文作徇與均相近

禹貢集釋卷之二

淮安山陽丁晏學

荆及衡陽惟荊州

荊州界自荊山南至衡山之南

鄭康成

言陽見其南至山

南也

正義

荊州今湖廣武昌漢陽安陸荊州岳州長沙衡

州常德辰州寶慶永州十一府郴靖二州施州衛襄陽

府南漳縣德安府安陸雲夢孝感應城應山五縣隨州

南境黃州府黃岡麻城黃陂黃安四縣四川夔州府建

始縣廣西桂林府全州及興安縣越城嶺北境

地理今釋

江漢朝宗于海

江水漢水其流遄疾又合爲一其赴海也猶諸侯之同心尊天子而朝事之鄭氏二水入海有似於朝百川以海爲宗宗尊也傳

鄭又謂荆楚之域記水之義以著人臣之禮疏引周禮春見曰朝夏見曰宗以證宗尊之義

九江孔殷史記作甚中

地理志廬江郡尋陽自注禹貢九江在南皆東合爲大

江班固應劭注云江自潯陽分爲九道正義九江在今江西

九江府德化縣城北今名潯陽江卽大江也自湖北興國州界流入逕瑞昌及縣境北又東合彭蠡湖水逕湖

口彭澤二縣入江南境

洪亮吉

江於此州界分爲九道甚

得地勢之中傳

案史記河渠書余南登廬山觀禹疏九江太史公從
孔安國問古文亦以九江近廬山則爲尋陽九江無
疑漢書司馬相如傳張揖注九江在廬江潯陽縣南
皆東合爲大江者續郡國志尋陽南有九江東合爲
大江鄭康成孔穎達亦引地理志九江在尋陽杜佑
通典九江今潯陽郡西北郭璞江賦流九派乎潯陽
蘇味道九江口詩近湓湓城曲斜吹蠡澤隈皆謂尋
陽之九江此漢以來相傳之古說也

釋文引太康地記劉歆以爲湖漢九水入彭蠡澤也
漢志豫章郡贛縣注豫章水出西南北入大江雩都
縣下湖漢水東至彭澤入江又鄱陽注鄱水餘汗注
餘水艾縣注修水南城注盱水建城注蜀水宜春注
南水南壄注彭水皆入湖漢以上豫章湖漢鄱餘修
盱蜀南彭爲九水劉子駿所謂湖漢九水入彭蠡澤
指此是漢人所說九江皆在豫章郡也

東樵謂以洞庭爲九江者自宋初胡旦始則宋以前
無是說矣東樵引山海經江淵澧沅之風交瀟湘之
淵是在九江之間以爲九江在洞庭之證然郭注謂

潯陽九江引書九江孔殷則非洞庭明矣太史公不敢言山海經東樵引以證經失之矣

緣江圖云九江始於鄂陵終於江口會於桑落洲鄂陵卽武昌縣古荊州之域桑落洲在今九江府德化縣東北元和志云江州潯陽郡葛貢揚荆二州之境揚州云彭蠡既豬今州南五十二里彭蠡湖是也荊州云九江孔殷今州西北二十五里九江是也彭蠡以東爲揚州界九江以西爲荊州界此說核矣

水經注江水篇缺佚不完淮水注秦立九江郡治壽春縣兼得廬江豫章之地故以九江名郡是卽尋陽

之九江矣水經禹貢山水澤地所在云九江在長江
下雋西北江水篇江水又東至長沙下雋縣北澧水
沅水資水合東流注之湘水從南來注之注云凡此
諸水皆注於洞庭之陂曾彥和謂沅漸元當作无即無水字說
元爲辰敘西湘資醴水皆合洞庭中東入于江是爲九
江宋胡旦晁以道傅寅毛晃朱子蔡傳並主洞庭之
說金履祥陳櫟亦同卽今洞庭湖也胡東樵亦以九
江爲洞庭非古義也全謝山曰東樵於九江深信長
沙下雋之說不知非水經之本文乃後世所竄入也
顧宛溪方輿紀要言九江主湘江皆未當

釋文引潯陽地記云一日烏白江二日蚌江三日烏江四日嘉靡江五日吹江六日源江七日廩江八日提江九日箇江孔疏潯陽記九江名起近代義或當然史記索隱引潯陽記源江作沙江餘同程大昌禹貢論引張僧監潯陽記烏江蚌江作日申曰烏蚌餘並同程氏禹貢論云樂史寰宇記李宗諤九江圖經亦皆本僧監所記

釋文又引張須元緣江圖云一日三里江二日五州江三日嘉靡江四日烏土江五日吹江六日白鳥江七日箇江八日沙提江九日廩江禹貢論引賈耽說

江有八洲曰沙曰人曰九江曰葛曰象曰烏曰咸曰
蚌此八洲者曲折而與江爲九說各不同要皆後人
命名非禹時所有也

史公訓孔殷爲甚中蓋古文說鄭君謂九江從山谿
所出其孔衆多以孔爲孔竅之孔亦爲異義

沱潛旣道

史記潛作涔漢書作濇師古音潛

釋水云水自江出爲沱漢爲潛鄭氏地理志南郡枝江下

故羅國江沱出西東入江師古曰沱卽江別出者也班固

潛水在今湖北安陸府潛江縣傅寅胡渭地理志及鄭皆以

荆梁二州各有沱潛

正義

據爾雅凡水之出于江漢者皆

有此名出于荆者荆之沱潜也出于梁者梁之沱潜也

林少類

案沱有二水經禹貢山水澤地所在荆州沱水在南
郡枝江縣今湖北荆州府有枝江縣縣東有百里洲
王氏炎曰士人謂枝江縣百里洲夾江沱二水之間
其與江分處謂之上沱與江合處謂之下沱此荆州
之沱也水經又云益州沱水在蜀郡汶江縣西南其
一在郫縣西南皆還入江江水注云江水逕汶江道
又有湔水入焉江水又東別爲沱書疏引郭璞爾雅
音義云沱水自蜀郡都安府嶺山與江別更流此皆

梁州之沱也

傅氏集解曰乾德中以漢江陵縣地置潛江縣在荆

南東北百有餘里或者水有自漢而來名之曰潛胡

氏錐指曰承天府志曰

安陸府明嘉靖屬承天府

漢水自鍾祥縣

北三十里分流爲蘆伏河經潛江縣東南復入于漢

卽古潛水也此荊州之潛也書疏引郭璞爾雅音義

有水從漢中沔陽縣南流至梓潼漢壽入大穴中通

峒山下西南潛出一名沔水舊俗云卽禹貢潛也史

記正義引括地志潛水一名復水今名龍門水源出

利州縣谷縣東龍門山大石穴下元和郡縣志縣谷

縣潛水出縣東北龍門山書曰沱潛旣道是也蜀都賦演以潛沫劉涓林注禹貢梁州云沱潛旣道有水從漢中沔陽縣南流至梓潼漢壽縣入穴中通岡山下西南潛出今名復水舊說云禹貢潛水也漢壽縣今四川保甯府廣元縣潛水在縣北此梁州之潛也又案馬融云沱湖也其中泉出而不流者謂之潛此別一義

疏引鄭云今南郡枝江縣有沱水其尾入江耳首不於江出也華容夏水首出江尾入沔蓋此所謂沱也潛則未聞象類鄭以華容夏水爲沱自別一義蘇武

从之至荊州之潛東樵錐指以潛江縣當之然此縣至宋始名潛江究非確義蔡傳謂潛水未有見鄭君闕如得之

漢志作潛漢中郡安陽縣自注鵲谷水出西南北入漢師古曰鵲音潛其字亦或从水水經潛水出漢中南鄭縣東陽旱山北至安陽縣南入于沔史記亦作涔涔潛一字通用史記梁州沱涔旣道索隱曰涔亦作潛沱出蜀郡郫縣西東入江潛出漢中安陽縣西北入漢蘇氏曰郫縣沱水安陽潛水梁州之沱潛也皆謂潛在安陽今陝西漢中府城固縣涔水在縣南

以此爲梁州之潛亦漢以來相傳之古義康成注漢中安陽有潛水其尾入江漢耳首不於此出鄭謂潛至巴郡江州入江漢志巴郡宕渠縣有潛水西南入潛水經潛水出巴郡宕渠縣又南入於江蔡傳據以釋經東樵駁之

雲土夢作乂

史記作雲土夢爲治漢志雲夢土作乂

雲夢之作水去可爲耕作畎畝之治傳江漢九江沱潛之功畢則水去而雲夢之土已耕治也

胡渭

沈括夢溪筆談云舊尙書禹貢云雲夢土作乂太宗皇帝時得古本尙書作雲土夢作乂詔改禹貢從古

本考漢書雲夢土作乂於文爲順

胡東樵謂太宗此一改殊多事不若仍舊之爲得但沈括稱太宗皇帝係宋太宗東樵謂唐太宗甚誤邵氏爾雅正義亦謂唐人改雲土夢作乂誤亦如之

又按錐指引筆談云石經倒土夢字今案筆談無此語唐開成石經亦作雲土夢作乂東樵謂從石經本則傳云澤中有土義甚愜當此石經不知何據殆誤引歟

又案作雲土夢不始於宋初之改本孔穎達正義一經之士字在二字之間蓋史文兼上下也則唐人

然水經汚水注亦引雲土夢作又疑古文孔傳本如是宋太宗所得古本尙書卽東晉古文書所云舊尙書作雲夢蓋馬鄭舊本也

雲夢諸書有合稱者周禮職方爾雅十藪呂覽淮南同戰國策楚王游於雲夢宋玉高唐賦楚襄王與宋玉遊於雲夢之臺此合稱雲夢者也有單稱雲者左傳定四年楚子涉睢濟江入於雲中楚語雲連徒洲是也有單稱夢者宣四年棄子文於夢中昭三年楚子以鄭伯田江南之夢宋玉招魂曰與王趨夢兮課後先是也或合稱連文或單稱省文雲夢一而已自

沈括羅泌等創江南爲夢江北爲雲之說蔡傳分爲
二澤雲土者雲之地土見而已夢作父者夢之地已
可耕治也其說支矣

司馬相如子虛賦雲夢者方八九百里水經禹貢山
水澤地所在云雲夢澤在南郡華容之東漢志南郡
華容縣雲夢澤在南荆州藪鄭注職方應劭風俗通
高誘呂覽淮南子注韋昭國語注俱本班志華容在
今荊州府監利石首二縣水經夏水東逕監利縣南
西南自州陵東界逕於雲杜沌陽爲雲夢之藪杜預
曰枝江縣安陸縣有雲夢元和志雲夢澤在安陸縣

南五十里雲夢澤在雲夢縣西七里胡渭謂東抵蘄州西抵枝口京山以南青草以北皆爲雲夢

郭注爾雅云今南郡華容縣東南巴邱湖是也徐堅初學記雲夢澤一名巴邱湖案青草湖卽巴邱湖水漲時與洞庭爲一邵氏簡端錄雲夢蓋兼洞庭有之孫星衍今古文疏謂澤卽洞庭湖近是

厥土惟塗泥厥田惟下中厥賦上下

田第八賦第三傳土雖與揚州同而地勢稍高故田加

於揚州一等

林氏

厥貢羽毛齒革惟金三品

史記毛作旄

土所出與揚州同傳揚州先齒革此州先羽毛蓋以善

者爲先正義職方荊州其利丹銀齒革楚語楚之所寶齒

角皮革羽毛所以備賦用以戒不虞者也左傳晉重耳

對楚子曰羽毛齒革君地生焉荀子曰楚人鮫革犀兕

以爲甲韜如金石觀於此信惟荆產最良也

胡渭

純榦枯柏

純木似樗而實

顏師古

純與椿同

胡渭

榦柘榦柏葉松身曰

枯鄭氏

純說文云木也或作樗櫟純也考工記鄭注引此樗

榦枯柏郭璞注中山經云樗木似樗樹材中車轅純

又作椿李時珍本草椿樗栲一木而三種樗栲皆不材之木不似椿堅實可入棟梁也胡東樵謂椿作樗蓋椿葉香故從熏椿之爲椿明矣

正義曰周禮弓人取榦之道七柘爲上知此榦是柘也金氏曰榦材中弓弩之榦周官所謂荆之榦是也爾雅釋木云檜柏葉松身枯檜聲近字通

礪砥磐丹

漢書作厲

礪磨刀石也精者曰砥

鄭氏

磐石中矢鏃丹朱類

傳

說文礪旱石也底柔石也或作砥郭璞注西山經云精爲砥粗爲厲也正義曰魯語肅慎氏貢楛矢石磐

賈逵曰磬矢鏃之石也丹者丹砂蘇子瞻石磬記余
自儋耳北歸江上得古箭鏃槩鋒而劍脊其廉可劇
而其質則石此卽所謂槩矢蘇頌圖經本草曰丹砂
今出辰州

惟箛箛楷三邦底貢厥名

史記作致貢其名

箛箛聆風也竹有二名或大小異焉

鄭氏

楷木名可以爲

箭

馬融

箛箛楷三物皆出雲夢之澤近澤三國皆致貢之

其名天下稱善

傳

廣雅釋草云箛箭也呂覽本味篇注箛竹箭也史記
集解引鄭注作箛風廣韻聆竹名文選長笛賦特箭

藁而莖立兮獨聆風於極危是聆風可爲箭也

蔡傳謂三邦未詳其地林少穎以爲妘胡之筭毛晃
指南云荊州蠻荆楚三國今不从呂氏謂純榦及楮
十物使貢其名鄭氏以厥名屬下讀厥名包匭今皆
不取

包匭菁茅

匭纏結也菁茅茅有毛刺者給宗廟縮酒重之故包裹

又纏結也

鄭氏

揚州先篚後包此先包後篚者以菁茅祀

貢重物包而且匭故升在篚前

吳氏

古人榨酒不以絲帛

而以編茅王室祭祀之酒則以菁茅取其至潔也

朱子

傳云匭匣也菁以爲菹茅以縮酒說文盛古文作匭
黍稷方器也吳都賦職貢納其包匭劉淵林注匭猶
結也菁茅生桂陽可以縮酒既包裹而又纏結之與
鄭義同一曰匭桺也卽孔傳義傳以菁茅爲二物疏
引周禮菁菹今不从傳又以包爲包橘柚尤臆說也
顏師古曰匭匣也菁菜也从孔說
厥筐元纁璣組

此州染元纁色善故貢之傳璣珠不圓者組綬屬說文玉
藻說佩玉所懸者皆曰組綬是組綬相類之物也正義
組以璣穿結爲組也吳澄

九江納錫大龜

史記納錫爲入賜

尺二寸曰大龜出於九江水中龜不常用錫命而納之

傳納入也

馬融

白虎通引禮三正記天子龜長一尺二寸漢食貨志

元龜距髀長尺二寸蘇氏謂有則納之若以下錫上

者不在常貢之列蔡傳及錐指取之今不从

浮于江沱潛漢逾于洛至于南河

史記潛作涔漢書作潛

逾越也河在冀州南東流故越洛而至南河

傳

凡曰逾

皆水道不通遵陸而後能達也

王

漢與洛不相通故曰

逾于洛自洛以至豫州之河故曰至于南河

會氏

荆河惟豫州

西南至荆山北距河水

傳

河南河也其不言南者蒙上

至于南河省文而可知也

胡渭

豫州今河南開封歸德南

陽汝甯五府汝州直隸大名府東明長垣二縣山東兗

州府定陶城武曹單四縣江南鳳陽府潁亳二州潁上

太和蒙城三縣湖廣襄陽府襄陽光化宜城棗陽穀城

五縣均州鄖陽府鄖保康二縣及鄖西縣東境德安府

隨州北境

地理今釋

伊洛漣澗既入于河

地理志宏農郡盧氏今河南府盧氏縣自注伊水出東

北入雒過郡一行四百五十里又上雒自注禹貢雒水

出冢領山

今陝西商州冢嶺山

東北至鞏

今河南府鞏縣

入河過郡二行

千七十里豫州川河南郡穀城

今洛陽府西北穀城山

自注禹貢

瀘水出晉亭北東入雒宏農郡新安

今河南府新安縣

澗水

自注禹貢澗水在東南入雒

班固

三水入洛合流而

入河言其不復為害也

正義

孔傳伊出陸渾山洛出上洛山澗出澠池山瀘出河

南北山今不取

瀘字淮南本經訓作屢澗不从水

榮波既豬

史記作榮播既都

滎播澤名

馬融

沈水溢出河爲澤也今塞爲平地滎陽民

猶謂其處爲滎播在其縣東春秋魯閔公二年衛侯及

狄人戰于滎澤此其地也

鄭氏

沈水入河溢爲滎滎是澤

名

正義

今河南開封府滎澤縣

胡渭

書疏云馬鄭皆作滎播史記索隱云今文並云滎播

周禮職方氏其浸波澁注波讀爲播引禹貢滎播既

都水經注引關駟曰滎播澤名又引呂忱曰播水在

滎陽滎播是一澤當作播爲是僞傳既改爲波顏師

古林之奇又以滎波爲二水蔡傳因之今不取

說文潘水名在河南滎陽潘播形相近卽此水也

導荷澤被孟豬

史記作被明都漢志作明豬

地理志濟陰郡禹貢荷澤在定陶東屬兗州

五經文字荷見夏書

古本亦作荷釋文荷徐音柯又工可反班志作荷顏監音柯失之今曹州府有定陶縣

東梁國睢

陽

今河南商邱縣

禹貢盟諸澤在東北

班固

言治荷澤之水衍溢

則使被及孟諸不常入也

顏師古

自荷澤至孟諸凡百四

十里二水舊相通

金氏

說文荷澤水在山陽胡陵孔傳亦云在胡陵而班志

謂在定陶傳同叔曰在定陶者其澤也在胡陵者其

流也實一水也水經注云荷濟別名也荷澤爲濟水

之所經因而導之所以殺濟瀆之勢也

周禮青州澤藪曰望諸爾雅十藪宋有孟豬左傳稱
孟諸之麋孔穎達云聲轉字異正是一地也今歸德
府商邱虞城縣界有孟諸臺

厥土惟壤下土墳壚

高者壤下者墳壚

傳

壚疏也

鄭氏

壚黑剛土也

說文

黑土曰

壚壚然解散也

釋名

壤則爲沃墳壚則爲瘠

王炎

厥田惟中上厥賦錯上中

田第四賦第二又雜出第一

傳

厥貢漆枲絺紵

史記枲作絺

職方氏豫州其利漆枲

林氏

紵屬

說文

織紵爲布及練也

顛部
古

左傳子產獻紵衣杜注鄭地貴紵毛詩可以漚紵陸
璣疏紵亦麻也

厥篚織紵

史記作其篚織紵

續絮也

說文細縣傳

案傳以織爲細故訓細縣卽今之絲縣也林氏以織
續爲二物胡渭謂織亦縉也今不取

錫貢磬錯

治玉石曰錯治磬錯也

傳

必待上之命而後貢

林氏

郊特牲云擊玉磬諸侯之僭禮也詩那箋玉磬尊故

異言之顏監謂亦待錫命而貢是也

浮于洛達于河

漢書作入于河史記作維

豫州去帝都甚近浮舟于洛則達于河達于河則達于

帝都矣

林氏

豫之東境徑自入河豫之西境則浮于洛而

後至河也

蔡傳

華陽黑水惟梁州

梁州界自華山之南至于黑水

鄭氏

華山之陰為雍州其

陽為梁州

曾氏

黑水今瀘水也

薛氏

漢志犍為郡南廣沔

關山符黑水所出北至夔道入江

班固

今敘州府南溪縣即漢夔道南廣地

黑水至夔道入江

通典引顧野王輿地記

梁州自有黑水為界與

導川之黑水不相涉

韓汝節

梁州黑水卽今雲南金沙江

其源發于吐番入雲南麗江府亦曰麗水

地理今釋

梁州今

陝西漢中府興安州西安府商州雒南山陽鎮安商南

四縣鞏昌府兩當鳳文成四縣徽階二州湖廣鄖陽府

房竹山竹溪三縣及鄖西縣西境四川成都保甯順慶

龍安馬湖五府潼川嘉定岷眉雅五州及敘州重慶夔

州三府瀘州江北諸州縣松潘建昌二衛疊溪營黎大

所天合六蕃招討同是也

同上

胡渭曰山海經黑水之間有若水地理志漢地縣有

黑水祠水經注自朱提至犍道有黑水今瀘水西連

若水南界滇池東經朱提樊道其爲梁州之黑水無疑矣東樵又謂漢時名瀘水唐以後名金沙江地理今釋瀘水麗江源異而流同實一水也

杜佑通典論黑水云孔鄭通儒莫知其所或是年代久遠遂至湮沒無以詳焉

孫星衍曰水經汚水東過南鄭縣南注云漢水又東黑水注之水出北山南流入漢庾仲雍曰黑水去高橋三十里諸葛亮牋云朝發南鄭暮宿黑水西五十里卽此水史記正義引括地志云黑水源出梁州城固縣西北太山以注華陽黑水蓋本古說案城固今

陝西縣也或以爲滇池夏時荒服之地禹跡不至也
岷嶓既藝史記岷作汶藝作藝

地理志蜀郡湔氐道注禹貢嶓山在西徼外江水所出
今四川松潘屬卽漢嶓山在麗西北隴西郡西縣注禹貢嶓豕山西漢
所出班固嶓豕山在漢陽西鄭水去已可種藝傳

桀班志謂嶓豕在西縣西漢水所出鄭君謂漢陽據
後漢時地名卽西縣也水經禹貢山水澤地所在云
嶓豕山在隴西氐道縣之南郡國志漢陽西有嶓豕
山今甘肅秦州卽漢隴西地嶓豕山在秦州西南卽
禹貢之嶓豕也自後魏地形志華陽郡嶓豕縣有嶓

豕山漢水出焉華陽今陝西漢中府甯羌州沔縣界
杜佑通典云嶓山在今漢中郡金牛縣括地志嶓豕
山在梁州金牛縣東二十八里並承魏收之誤後人
遂以甯羌州北之嶓豕附會爲東漢水之源不知東
漢水卽漢志沮水未嘗經甯羌之地也蔡傳又謂嶓
豕一山跨兩州縣又誤以漢中之西縣爲隴西之西
縣郢書燕說不足置辨胡東樵亦誤從俗說反駁漢
志之乖謂有二嶓豕其謬甚矣

沱潛旣道

漢書作潛史記作沱

地理志蜀郡郫縣自注禹貢江沱在西東入大江汶江

縣自注江沱在西南東入江班固沱江源出四川雜谷屬

界東南流至保縣西北入大江

洪亮吉

或以爲保縣玉輪

江也

孫星衍

案沱出郫縣卽今之郫江保縣屬四川茂州

今茂州北有漢汶江故城潛水一名復水又曰龍門水
在今四川廣元縣與梁州之沱潛別互詳見前

鄭注謂江原有郫江首出江南至犍爲武陽入江豈
沱之類與案班志江原下有郫水自別一水與沱無
涉今不從

蔡蒙旅平

祭山曰旅平言治功畢

傳

地理志齊蒙注漢嘉縣

鄭氏

漢志屬郡青衣有禹貢蒙山應劭云順帝改曰漢嘉
縣鄭注從順帝改名今四川雅州府名山縣卽漢青
衣縣地蒙山在州南鄭以蔡蒙爲一山僞傳妄以蔡
蒙爲二山疏云蔡山不知所在蓋本無此山也宋歐
陽忞輿地廣記云蔡山在雅州嚴道縣葉少蘊以縣
東五里周公山當之蔡傳从輿地廣記閩潛邱謂蔡
山不可信是也胡東樵又以爲峨眉山其說亦想當然
耳非確論也

和夷底績

和土夷所居之地也和讀爲桓地理志桓水出蜀郡蜀

山西南行羌中者也鄭氏水經桓水出蜀郡岷山西南行

羌中入于南海注自桓水以南爲夷書所謂和夷底績

也鄭道元

案如氏注漢書云陳留之俗言桓馨如和鄭讀和爲桓正與下因桓是來合其說確矣寰宇記有和川水在榮經縣北晁以道謂卽禹貢之和水曾彥和从之林少穎謂今雅州有和川鎮卽和夷故地晁氏又謂夷水出巴郡魚復縣又東過夷道縣雖指駁之東樵謂和水卽泚水又謂漢志泚水乃泚字之誤當從說文作泚案顏注泚音哉玉篇廣韻十六哈泚水名段

若膺說文注又改泚字作泚卽泚字紛紛肌造未足信也

厥土青黎

史記作青黎

色青黑而沃壤

傳

史公作驪詩傳謂純黑曰驪亦黑色也馬融云黎小疏也顏師古曰色青而細疏今不取

厥田惟上下厥賦下中三錯

田第七賦第八雜出第七第九三等

傳

厥貢璆鐵銀鏤簪磬

黃金之美者謂之鏤鏤剛鐵可以刻鏤也鄭氏蜀郡卓氏

至以鐵冶富擬邦君則梁州之利尤在鐵故鐵先於銀

也會氏漢志犍爲郡朱提縣山出銀每銀八兩爲一流直

一千五百八十仁漢于犍爲水濱得古磬十六枚金氏

臺登縣山有磐石禹貢所賦華陽國志鐵石山在臺登縣東

三十里有磐石火煉成鐵極剛利元和志囊字記鐵石山

磐石火燒成鐵爲劍戟極剛利則與荆之唯中矢鏃者

異矣胡渭

釋文璆徐又居虬反馬同徐邈馬融俱讀若鏐又引

韋昭郭璞云紫磨金並與鄭合經以璆鐵對舉當訓

金爲長且與下璆琳有別傳訓玉名東晉古文改作

璆从玉故偽傳云然

熊羆狐狸織皮西傾因桓是來

漢志作西頃因桓是像

言貢四獸之皮又貢雜屬

顏師古

以屬者曰織以裘者曰

皮

蘇氏

治西傾山因桓水是來言無他道也

馬融

地理志西

傾山在隴西臨洮

鄭氏

桓水已見上文

漢志水經俱以禹貢桓水在蜀郡孔穎達正義史記

索隱俱从之夏氏謂桓水一名白水白水出今陝西

泃州衛東南分水嶺胡東樵取其說今不从

西傾在臨洮山在今陝西洮州衛西南三百三十餘

里西套厄魯特界延袤千里外跨諸羌正與桓水行

羌中相接魏書吐谷渾傳阿豺田于西彊山卽西傾
段國沙州記稱嶺臺山皆一山異名也

鄭氏此注云桓是隴阪名其道盤桓旋曲而上故名
曰桓今不从

浮于潛逾于沔入于渭亂于河

史記通作踰

漢上曰沔越沔而北入渭浮東渡河正絕流曰亂

傳或

謂漢爲沔

鄭氏

水經桓水注自西傾至葭萌入于西漢卽

鄭元之所謂潛水者也自西漢遡流而屈于晉壽界沮
漾枝津南歷岡穴迤邐而接漢沿此入漾書所謂浮潛
而逾沔矣歷漢川至南鄭縣屬于褒水暨于衙嶺之南

漢書地理志
卷二
三
漢水支澗于斜川屈于武功而北達于渭水

鄭道元

水經汚水出武都沮縣東狼谷口注云汚水一名沮水庾仲雍云是水南至關城合西漢水漢水又東北合沮口同爲漢水之源也故知氏曰北方人謂漢水爲汚水蓋與汚合也

史記河渠書武帝時有人上書欲通褒斜道及漕事張湯問之曰褒水通汚斜水通渭皆可以行船漕孫淵如謂汚不通渭故經文言逾郿注以褒斜二水爲白汚入渭之道恐未必是禹迹也

漢沮縣今陝西漢中府略陽縣東南至汚縣西南入

漢水名曰沮口

黑水西河惟雍州

雍州界自黑水而東至于西河

鄭氏

黑水出張掖雞山南

流至燉煌過三危山南流入于南海

酈道元水經注書正義引今水經注

脫此文張掖今甘肅府張掖縣

河經龍門而南至于華陰爲西河

胡渭

州今陝西臨洮平涼慶陽延安鳳翔五府西安府長安

咸寧咸陽興平臨潼高陵鄠藍田涇陽三原盩厔渭南

富平醴泉朝邑郿陽澄城白水韓城華陰蒲城同官武

功永壽三水涇化長武二十七縣同華耀乾邠五州羣

昌府隴西安定會寧通渭寧遠伏羌西和秦安清水漳

禮十一縣秦州及榆林寧夏寧夏中靖遠岷州洮州甘
州莊浪諸衛所南至西傾積石西踰三危北抵沙漠皆
是也

地理
今釋

括地志源出伊州伊吾縣北百二十里南流絕三危
山在沙州燉煌縣東南四十里地理今釋雍州黑水
出陝西甘肅塞外南流至河州入積石河今俗名大
通河是也諸說小異今从酈注

禮記子夏退而老於西河之上史記魏武侯浮西河
而下吳起爲西河守皆此西河之水也

弱水旣西

衆水皆東此獨西流故記其西下也鄭氏導之西流至于

合黎

傳

地理志張掖郡刪丹桑欽以爲弱水自此西至

酒泉合黎說文作溺水云溺水自張掖刪丹西至酒泉

合黎餘波入于流沙桑欽所說又云岷山溺水所出許慎

案岷山卽張掖雜山

刪丹今甘州府山丹縣

淮南子弱水出窮石山今山丹縣西南有窮石山卽

其地通鑑魏太武擊柔然循弱水西行魏書稱西接

張掖水賈耽謂張掖河卽弱水是也法顯佛國記謂

之流沙河在今山丹非絕域之弱水也又山海經崑

崙邱下弱水郭注其水不勝鴻毛史記大宛傳稱弱

水西王母漢志臨羌縣有西王母石室弱水昆侖山
祠楚辭哀時命云弱水汨其難爲兮路中斷而不通
漢書西域傳大秦國有弱水流沙西王母所居處近
於日所入也十洲記禹乘躡車渡弱水博物志漢武
帝時西域胡來獻香乘毛車以渡弱水史記正義弱
水出女國北阿耨達山卽崑崙也舊唐書東女國王
居康延川中有弱水南流用牛皮爲船以渡漢書司
馬相如大人賦經營炎火而浮弱水兮應劭曰弱水
出張掖師古曰弱水謂西域絕遠之水乘毛車以渡
者耳非張掖弱水也顏監此說最核以上諸書所云

弱水在絕域與禹貢弱水無涉蔡傳駁程大昌條支之說甚是又引柳宗元愚溪對謂弱水不能負芥此卽郭景純所云不勝鴻毛非此經之弱水也

涇屬渭汭

屬入也

馬融

水北曰汭言治涇水入于渭

傳

汭水相入也

說文地理志安定郡涇陽开頭山在西禹貢涇水所出東

南至陽陵入渭過郡三行千六百里雍州川

孫星衍曰過郡三

定右扶風左馮翊也涇陽縣今甘肅平涼府陽陵故隴城在今陝西西安府高陵縣西南涇水在縣東入渭

西郡首陽渭水所出東至船司空入河過郡四行千八

百七十里雍州寢

孫曰過郡四隴西天水右扶風左馮翊也

孔傳屬遼也今不从蔡傳謂涇渭汭三水連屬引周禮其川涇汭黃東發胡東樵俱非之今不从

漆沮既從

地理志北地郡直路自注沮水出西東入洛左馮翊襄

德自注洛水東南入渭

班固

案直路今陝西中部

文作瀘水云瀘水出北地直路西東入洛

許

水經渭水

又東過華陰縣北注云洛水入焉關駟以爲漆沮之水

也又沮水注云沮水東注鄭渠濁水與沮水合俗謂之

漆水又謂之爲漆沮水

鄭道

漆沮卽馮翊之洛水

顏師古

毛詩自土沮漆周頌猗與漆沮傳謂漆沮岐周二水

皆謂扶風之漆沮與禹貢漆沮爲洛水迥不相涉孔穎達導渭正義既知東過漆沮與毛詩漆沮別而此疏猶引地理志漆水出扶風漆縣誤矣僞孔傳謂漆沮爲洛水出馮翊而又曰漆沮二水名失之蔡傳亦知漆非扶風之漆水又謂漆水來經華原縣合沮水總由不知漆沮之爲一水耳

洪亮吉曰漢時沮水由鄭渠入洛故洛水亦有沮漆之名非謂漆沮卽洛也案周禮職方氏其浸渭洛鄭注洛出懷德毛詩瞻彼洛矣傳宗周漑浸水也孔疏洛水則漆沮是也與下導洛之洛別

豐水攸同

地理志作道師古曰道古攸字也攸所也

地理志右扶風鄠自注鄠水出東南北過上林苑入渭

班固同之于渭傳詩曰豐水東注維禹之績言同于渭也

正義曰屬曰從曰同皆主渭而言也蔡豐灋鄠音義同今

豐水在陝西咸陽縣東南入渭

荆岐既旅終南慎物至于鳥鼠

史記慎作啟

地理志左馮翊襄德自注禹貢北條荆山在南下有彊

梁源

襄德今侯西富平縣

右扶風美陽自注禹貢岐山在西北

美陽

今同州府

右扶風武功自注太壹山古文以爲終南垂

扶風縣山古文以爲慎物

武功今鳳翔府郿縣

皆在縣東

班固

已旅祭言治

功畢此荆在岐東非荆州之荆

傳

太一山亦名太白山

在武功縣南

水經注

鳥鼠詳見後

案漢志據古文以太壹爲終南孟堅所稱卽孔壁古文說也初學記終南山引五經要義云終南山長安南山也一名太一要義劉向所撰向親校中秘古文故所說與孟堅合足徵漢志之核續漢書郡國志右扶風武功永平八年復有太一山本終南文選西京賦於前則終南太一吳薛綜注二山名也李善从其說失之然水經渭水注引杜預曰中南亦曰太白山在武功縣南初學記引秦州記太一山古文以爲終

南福地記云終南太一山在長安西南五十里陸德明孔穎達並據漢志太一卽終南史記索隱同皆古文說也

又續漢書郡國志右扶風垂山本散物釋文惰物山名亦引漢書云垂山也胡東樵謂垂山卽太一之北峯無二山也孫淵如改垂山爲岳山俗呼敖山敖岳聲之轉肌說不可从

水經禹貢山水澤地所在華山爲西嶽在宏農華陰縣西南注古文之惰物山也如酈之說則垂山當作華山字形之誤

華山與終南縣延相望又鳥鼠爲渭水所出華山在渭水南地勢接連則以華山爲幘物可備一說

原隰底績至于豬野

詩云度其隰原卽此原隰是也原隰鹵地從此致功西

至豬野之澤也

鄭氏

地理志武威縣注休屠澤在東北古

文以爲豬塹澤

班固

今甘肅涼州府鎮番縣卽武威縣地

休屠澤在縣東北

水經禹貢山水澤地所在云都野澤在武威縣東北

都豬音義同

三危旣宅三苗丕敘

史記宅作度丕敘能大序

西裔之山已可居三苗之族大有次敘傳水經禹貢山

水澤地所在云三危山在燉煌縣南注卽尙書所云竄

三苗于三危春秋傳曰允姓之戎居于瓜州杜林曰燉

煌古瓜州也酈道元三危在沙州燉煌縣東南四十里山

有三峯故名括地志三危旣宅此治黑水之成功也傳三氏

苗今爲湖廣岳州府地吳起曰三苗之國左洞庭右彭

蠡是也胡渭

鄭氏引河圖及地說云三危在鳥鼠西南與岐山相

連當岷山則在積石之東南水經注四十引山海經

云三危山三青鳥居之在鳥鼠山西太平御覽地部

引河圖括地象曰三危山在鳥鼠之西南與汶山相接皆與鄭合如鄭此說則三危非今安西州燉煌縣之三危也戴震水地記謂燉煌三危山不協禹貢之又其名蓋後起也孔穎達疏又謂三危山必是西裔未知山之所在諸說不同今从酈注

厥土惟黃壤

黃者土之正色

蔡傳

黃壤最貴故雍田上上

陳

厥田惟上上厥賦中下

田第一賦第六人功少

傳

治水之後卽爲此差在後隨

人少多必得更立其等此非永定也

正義

厥貢惟球琳琅玕

史記作璆琳

球琳皆玉名

傳琅玕珠也鄭氏

爾雅西北之美者有崑崙虛之璆琳琅玕焉郭注璆琳美玉名琅玕狀如珠也山海經曰崑崙山有琅玕樹說文球玉磬也或作璆琳美玉也琅玕似珠者僞孔傳亦云石而似珠云石非也雖指引傳云石而似玉更誤爾雅崑崙虛之璆琳胡東樵邵二雪謂卽于闐之玉近之

商頌受小球大球箋謂小玉尺二寸圭大玉琕長三尺玉藻笏天子以球玉毛詩韓琫有琕傳有璆琕胡

東樵謂圭瓊玕皆用球爲之不止鳴球磬材也

上林賦玫瑰碧琳西都賦琳珉青熒琳乃玉之青碧
色者鄭書注謂琳美石也今不从

張衡詩何以報之青琅玕曹植詩腰佩翠琅玕名璽
別錄琅玕陶宏景曰此蜀都賦所稱青珠也

浮于積石至于龍門西河會于渭汭

地理志金城郡河關自注積石山在西南羌中左馮翊

夏陽

今陝西韓城縣

自注龍門山在北固龍門山在同州韓城

縣北五十里李奇云禹鑿通河處廣八十步

括地志此州

達帝都有一道浮于積石至于龍門西河者一道也自

渭汭以達于河者又一道也

林氏

織皮崑崙析支渠搜西戎卽敘

史記作昆侖敘作序漢書作昆崙渠與師古日與讀

日搜

崑侖在臨羌西析支在河關西

馬融

別有昆侖之山非河

所出者也

鄭氏

崑崙析支渠搜三國名也

顏師古

三國皆西

戎故以西戎總括於下

林氏

三國皆織皮

蘇氏

梁州言熊羆

狐狸織皮此獨言織皮者蒙上文也

傅氏

地理志金城郡臨羌縣注西北至塞外有昆侖山祠

崔鴻十六國春秋云張駿時酒泉太守馬岌上言酒

泉南山卽崑崙之體括地志云在酒泉縣西南八十

里今甘肅肅州西南昆侖山正在古雍州之域卽禹貢之崑崙也與河出昆侖無涉馬鄭說確不可易

水經河水注引司馬彪曰西羌者自析支以西濱於河首在右居也河水屈而東北流逕於析支之地是爲河曲矣後漢西羌傳西羌本三苗及舜徙之三危河關之西南羌地是也漢於賜支賜支者禹貢所謂析支者也馬融王肅俱謂析支在河關其說核矣

地理志朔方有渠搜縣禮三朝記曰北發渠搜南撫交趾水經注河水自朔方東轉逕渠搜縣故城渠搜在今陝西懷遠縣北番界中陸德明釋文亦引漢志

在朔方卽禹貢之渠搜也

傳以崑崙析支渠搜爲四國正義謂析渠搜爲二恐
非傳意並西戎爲四國鄭謂崑崙析支渠搜爲三山
之野皆西戎也蘇氏謂此文當在浮于積石三句之
前簡編脫誤今皆不从